

【清】黎庶昌著 黎鐸 龍先緒 點校

黎庶昌全集 三

上海古籍出版社

本册目次

全黔國故頌（卷八至卷二十三）

.....

一五三九

全黔國故頌二

黎
鐸
點
校

全黔國故頌卷八

名臣

國朝

張日晷

《國史列傳》：

張日晷，貴州貴筑人。嘉慶二十二年進士，改翰林院庶吉士，二十四年散館，授編修。道光元年、二年，歷充順天鄉試同考官。四年，大考二等，賜文綺。五年，充湖南鄉試正考官。七年，仁宗睿皇帝聖訓告成，日晷以充武英殿提調議叙，得旨，遇缺題奏升用。八年五月，京察一等，復帶引見，記名以道府用。七月，充河南鄉試正考官。九年，授四川叙州府知府。十三年，調成都府知府。十七年，擢建昌道。十九年，越嵩、峨邊等廳夷匪滋事，日晷以總督寶興、徽、偕總兵包相卿堵緝，尋偕按察使蘇廷玉督辦添設碉堡，招復流亡，編集團練各事宜。二十年，升浙江鹽運使。二十一年，遷湖北按察使。二十二年二月，署布政使。七月，升河南布政使。十二月，接纂

《大清一統志》告成，日最以前充纂修，議叙加二級。二十五年，以中牟大工合龍，下部優叙。二十六年，升雲南巡撫，未赴任，丁母憂。二十九年七月，服闋，仍授雲南巡撫。十二月，偕總督程裔奏免各銅廠民欠無著工本銀六千餘兩，允之。三十年七月，以思茅廳邊外遊匪滋擾，沿及近甲猛地，逼近茶山，戕害官弁，偕程裔奏調各鎮弁兵兜剿。得旨，務期盡數殲除，迅速蒞事。八月卒。咸豐元年，入祀鄉賢祠。子軸新，舉人。

常恩《張日最傳》：

歲癸卯，余于役東河時，張曉瞻先生開藩豫省，晉謁之下，見其言論風采，已深欽佩。當時，工未告竣，旋即拜別。乙巳春，先生陞見，遂得重晤於京華，暢叙積忱，彌殷依戀。迨至丁未春，來守習安，時先生奉諱里門，余登堂吊唁，離悰又爲之一慰。是歲冬，調守黎陽，於是與先生別矣。己酉春，自黎郡再過先生里，與商共修郡志。秋七月，屬拔貢吳寅邦持函詳商，並屬普定魏令面請先行鑒定，先生慨然當捐志費銀二百金。九月，先生奉命撫滇，道經安順，諄諄然以修志爲念。庚戌五月，寄呈志稿五卷，先生舊疾復膺，七月竟卒於滇。十一月，志稿全成。安平副榜何官鄭來至志局，商之吳寅邦公，請於余曰：「曉瞻中丞位隆望重，不傳之無以爲志乘，然寅邦等晚輩末學，未敢操筆，請余爲之傳。」余雖未敏，然知先生最深，故不敢以不文辭，因謹按狀。

先生姓張氏，諱日最，字曉瞻，清鎮人，寄學貴筑。其先世江左望族，位通顯者，代不乏人。祖端望公隨其兄世昌公官清鎮縣令任，遂家焉。父健齋公，乾隆壬午優貢，歷官都勻、開泰、定

番學博。先生生而稟異，至性過人。年數歲，父健齋公受粵西善方伯聘，主講秀峰、潯江書院未歸，母支太夫人親教之讀，過目即不忘。甫九齡，隨父之開泰任，計一年讀較前讀於閭墩者十倍之。繼隨任定番，日侍父母左右，溫清定省，未嘗一日缺，餘惟以讀書爲事。嘉慶壬戌年，父卒於官，哀毀盡禮，先生是時已有孝子名。扶櫬歸葬後，一貧如洗，所有僅破屋數間，荒園一畝，饗殮不繼，則采蔬和粥食之以爲常。雖孤苦零丁，而日恒不廢學，每至夜分，不中程不止。年十五，補博士弟子員，尋食餼，試冠軍。歲赴貴山讀，春初去，歲杪方歸，方伯李奕園先生見其文，大賞識，招之讀於署。年十九，應庚午科鄉試，以第一人列賢書。丁丑成進士，御試第一，入翰林。迎母至京養，日奉輿以行，歷七千里無倦色。辛巳、壬午分校禮闈，乙酉典試湖南，戊子再放河南典試，由武英殿提調出守四川叙州府，捐廉置勵節堂，買田收租，籍孀婦之無依者，旋調成都府知府。成都爲蜀中首郡，治理尤難，先生以道德爲經濟，恩威並著，教養兼施。如辦賑一事，川民賴以全活者億萬家。折獄如神，民至今猶以神仙稱。及轉建昌兵備道，先生巡行邊境，設險置守，誠爲先事預防。厥後任按察使司，殫精竭慮，剔弊推恩，枉者伸之，屈者直之，而尤警惕於法無可貸，情有可原二語。迨陞河南布政使司，時豫值河患，賑恤頻仍，先生誓告吏人，不使私毫剋減，計前後所施粥糜、藥餌、袴襦、廬舍之費，捐助者約三萬餘緡。

道光二十六年八月，陞授雲南巡撫。九月，母疾，先生衣不解帶，湯藥嘗，拜疏籲懇給假二十日，俟母病愈起程，而母疾卒不起，先生一慟幾絕。從此蔬食食粥，茹素三年，寢苦枕塊不離

櫬側，其受濕致病，卒以沈疴不瘳之由未始不原於此。二十七年二月，扶櫬抵里，日則芒鞋簪笠，求地山中，酷暑炎天，揮汗如雨，卜選半載而後安葬，安葬又半載而後墓工告成。廬於墓側，朝夕奠獻，一憶母言，淚涔涔下。二十八年二月，而先生疾作矣。疾起之初，猶旋發旋止。至二十九年，而疾轉劇，或一日一發，或間日一發，發必經三四時而後止。迨七月，而自家起用之報至，先生知疾不可爲，而感激聖明高厚，力疾赴滇。到任以後，即清理滇中積弊，政治一新。所有文件，必親裁奪，手不停披，夜三鼓猶未寢，五更即起決公事。厥疾日復一日，延至七月，而卒於官。

先是，三、四月雲南旱甚，龍王廟在小黑龍潭，距省十餘里，先生步行祈禱，日詣廟拈香，不數日而甘霖立沛。今日先生往矣，而先生之大節有不與之俱往者。三年茹素，其古之三年憂三泣之意與；力疾視事，其古之鞠躬盡瘁死而後已之心與。能爲孝子，而後爲忠臣，於先生益信。生則蜀、豫長生祀之，沒則滇、黔道路泣之。行見名宦、鄉賢，俎豆千古矣。而況其學爲聖賢之學，心本聖賢之心，其食報更有深焉者哉！

弟日蟲，嘉慶壬午優貢，任湖北麻城縣知縣，鹽課司提舉。長子軸新，二品蔭生，道光丙午科舉人；次子輶新，庠生，早歿；三子輶新，廩生。

贊曰：黔中僻在天末，去神京七千餘里，士大夫能通籍者已罕，至建節擁旄，尤不數數觀，況立德、立功、立言，躋於三不朽者乎！吾聞黔人士言，中丞始改庶常日，星相家多謂其貴不可

必，壽不能大。黔人之官京師者，亦往往信之。然中丞竟官至二品，壽躋六旬。其植躬劬行，深
有得力於心相立命之說久矣！後之君子，聞中丞之風，其亦可以興乎！

翟煜觀《張中丞墓銘》：

公諱日晷，字東升，號曉瞻。其先鳳陽人，二世祖亘從明太祖開基，贈昭勇將軍。厥後代有
勳伐，封護國侯，官都督僉事。終明之世，襲蘇州衛指揮使，居蘇州。祖世楷隨兄世昌宰清鎮，
遂家焉。考諱德異，號健齋，優貢生，官學博。以公貴，皆贈如公官。健齋公原配王太夫人，繼
配支太夫人。生二子，公居長。公生之歲，健齋公赴粵西主講。三載歸，公已能識字。六齡解
作書，爲健齋公通音問。後補官開泰，道遠不能挈眷。公方九齡，請從往，朝夕承歡。尋隨任定
番學正，業遂大成，於時有「聖童」之目。年十五，入貴筑邑庠，以筆耕供菽資。李長森方伯奇其
文，期以大受。十九，舉鄉試第一，丁丑成進士，以御試冠天下，入翰林。辛巳、壬午分校順天鄉
試者，再乙酉、戊子典試楚、梁，所得多知名士。歷充文淵閣校理，國史館纂修，撰擬進奉文字，
臺館交推之，才遇之隆，世稱極盛。然當其髫齡孤露，飯脫粟，無盤蔬。晝從師讀，夜受學於母，
漏數轉不休，語及艱危事，輒嗚咽流涕。讀公《篝燈課子圖》情狀，其所處何其難也。公惟備
歷艱辛，故得磨厲其才能，以成天下之務。其出守叙州也，捐廉創勵節堂，使窮嫠得所養，郡人
感公慈惠，奉太夫人長生位，歲演劇祝生朝。筠連、雷波被水，挾俸金往救，使不成災。其移守
成都也，鋤強暴，治訟獄，動合機宜，民以「神仙」稱。其分巡建昌也，提兵鵬剿夷匪，建城築礮，

邊民賴之以安。歲饑，籌款備米粥，分廠以食男女，率所屬同其調濟，療其疾病，而收養其無歸。又憾其人鮮科第，無師保，乃置田產，聘名宿，授之以書籍，加之以提命，創建文廟，奎閣以壯其觀。未幾，遂有登賢書者若爾，人奉公長生位祠之。繼乃轉運浙（二）江，旋擢楚北廉訪，未及任，皇帝以公治蜀久，習其民，仍改官蜀臬。蜀中讞獄故繁重，公廉平持法，小大之獄，必得其情，一時平反者衆，民至今猶能道其事不衰。其開藩中州也，連歲河決，淹及汴城，公馳視城頭痛哭，晝夜督令閉城門，堵罅隙，培護堤缺，濡及衣襦，修築賑撫，屏營徬徨，至於成疾，復捐助襦袴、糜粥、醫藥、廬舍之資，幾三萬緡，不惜其費。塞河之料，舊資於民，公亟令自行采買，恐病民也。大災既息，二十五州縣之民，爭來拜頌。皇帝嘉許，特擢公馳驛撫滇。因太夫人疾，拜疏乞假，旋以奉諱去，哀毀致疾。服除未瘥，復拜滇撫之命。力疾以往，諄諄於察吏安民爲亟，以博大惇厚爲閭左培元氣，以廉明質慤爲士大夫端趨向，無灼灼可驚之譽，而吏治民風，日臻上理，中外群推公能以才運德。惜久病增勞，遂致不起，滇民涕泣相走送。悲夫！悲夫！

公性純孝，歷官中外，皆奉輿以行，無事不稟承親訓，曲當親心。訓其弟曰融公，使發名成業，亦以優貢官司鐸，爲健齋公繼，並以官學教習出宰麻城。訓其子使各知進取。又推及其宗族，使教養各安，非善成親意者乎？方健齋公之卒於官也，公才十二齡耳！危急存亡，間不容髮，乃卒能立致通顯，以報國承家，俾健齋公未竟之志以伸，太夫人堅苦之操以著。雖賢親善教，亦順承者至也，可不謂孝乎！至若資稟，剛明清介，澹然無欲，律已嚴而待人恕，自奉薄而

賙人急，遇事處之以厚，與人必盡其誠，則性與學之相成也。綜觀公生平，懿行在倫常，實學在經濟，文章在史策，頌禱在蒼生，不徒黔之偉人，亦當代之完人也！昔蘇文忠贊王元之曰：「不有君子，其能國乎？」吾於公不勝低徊往復焉！

公生於乾隆辛亥十月初六日巳時，沒於道光庚戌七月初十日戌時，享年六十。配猶夫人。子三：長軸新，丙午科舉人；次輶新，邑庠生，先公卒；次輶新，邑庠生。女一，適廣順拔貢生但賡良。孫男一，紹煦；孫女一，均幼。將以咸豐元年二月十四日葬公於清鎮城西谷上里崇益山之陽，其子屬煜觀敬銘公墓。以公十餘齡即受先大夫國士之知，煜觀與公夙敦世好，誼不容辭。然公深潛不炫露，又與公違處久，其行事罕聞見，謹略狀梗概爲公銘焉。

銘曰：昔先君子，設教筆峰。龍門在望，鹿洞攸崇。洪爲張公，翹楚其中。鑄顏而卓，喻賜以工。歲在庚午，脫穎而出。丁丑會科，御試第一。天上玉堂，如椽手筆。染翰飛文，皇華原隰。公校瑣闥，燕臺月朗。誠開衡雲，珊瑚盈網。嵩高石堅，河洛波廣。玉尺量平，冰壺色爽。公之守郡，始自戎州。載移錦里，益懋宏猷。論文好士，緩帶輕裘。乖崖法立，樂全像留。上南衣豸，膺力方剛。瘡痍悉起，翰墨流香。地呈其秀，天破所荒。一韓一范，伏彼戎羌。既轉越巇，遙領刑（二）臬。竹馬重迎，郭侯比烈。折柳橋長，浣花溪潔。民自不冤，廣平心鐵。攝提格歲，滌籓開封。民安吏肅，衡平鑒空。園竹爲榎，河伯許功。上追神禹，遠邁文龍。是饘是粥，曰襦曰袴。厦千萬間，安宅夾路。如雷筠水，杖策履屨。如雅安饑，鼓腹含哺。既莫豫北，建節

滇南。吉暉未莅，寶婺先潛。銜恤歸里，居廬三年。點蒼福厚，重擁旌旂。力疾而行，拜茲嘉命。國有殊恩，爲臣止敬。盡瘁鞠躬，允昭忠藎。宦績丕著，家乘載詳。孝乎惟孝，春永萱堂。蒸蒸色養，板輿是將。含飴官舍，俾壽而康。頡頏坡穎，棣萼輝聯。成均展驥，大邑著鞭。歸來陶令，綵服怡顏。白華粲粲，樂莫大焉。有子能文，詞豪詩伯。桂掇丹林，杏尋紫陌。秀發蕊珠，美成連璧。孫枝蘭芬，克承世澤。以公之才，宜作鹽梅。胡然開府，星折中台；以公之德，宜壽洪崖。歲行在戌，舟引蓬萊。維余與公，師資同事。公邁房喬，予慚福時。九萬鵬搏，俯許垂翅。笛滿山陽，黃壚揮淚。碧雞峭崿，金馬崔巍。龍蛇讖起，風馬雲旗。辦香篆小，綠炬光微。虞淵西日，絮酒空悲。彌天戢棺，佳城載告。誌隧宜銘，我何以報。學殖荒落，難發蘊奧。文愧伯喈，碑同有道。幽室長存，邈哉矩矱。鷓鴣聲傳，白羊石固。雲初烝嘗，春霜秋露。江都有墳，沔陽有墓。

張軸新《行述》：

公諱曰最，字東昇，號曉瞻，晚號松廬。張氏先世居鳳陽五河，自公二世祖諱埜，從明太祖開基，贈昭勇將軍。三世祖德明，彭城衛左所副千戶，贈昭勇將軍，封護國侯。四世祖真明，浙江左軍都督府都督僉事，鎮守浙江、江西、福建三省，授榮祿大夫。終明之世，襲蘇州衛指揮使，居蘇州。太高祖季繁公諱介祉，贈通議大夫，河南按察使，晉贈通奉大夫，都察院左副都御史；高祖扶九公諱起鵬，鑲藍旗官學教習，任陝西安塞縣知縣，授文林郎；曾祖祿綬公諱沆，

康熙戊午副榜，任廣東東安縣知縣，授文林郎；祖端望公諱世楷，贈奉政大夫，翰林院編修加四級；考健齋公諱德異，乾隆壬午優貢生，歷任都勻府開泰縣訓導、定番州學正，授文林郎，皆贈如公官。公曾祖妣氏繆、吳、李，祖妣氏孫，前妣氏王，皆晉贈夫人，妣氏支，晉封太夫人。

公祖考隨公伯祖駿聲公諱世昌宰貴州清鎮縣，滯留不歸，始寄居焉。我祖考健齋公生二子，皆晚出，公居長。以乾隆辛亥生，幼而至性過人。方我祖考官開泰學博，時距家千里，不能挈眷行。公甫九齡，孑然隨往，惟恐廣文署冷，藉解親顏。至則旦夕承歡，受教文史，三年隨侍，學業遂成。嗣我祖考遷定番州學正，太夫人始携我叔父旭臨公暨姑母偕之任，學署荒涼，即於明倫堂棲止。壬戌我祖考卒於官，公僅十二齡，我叔父纔八齡耳。蕭然無策，篋餘俸金二錠以治斂具，門下士咸致賻，得數十金，強備資斧。太夫人以我叔與姑幼弱，携以先歸。彼時無強近之親，無幹練之僕，凡赴告歸窆，皆公任之。悲毀迫切，執禮如成人，髫齡即有「孝子」之目。癸亥，公出就外傳，以我叔幼，令從鄰師讀。太夫人晝操井臼，夜則督課書史，宵分猶琅琅不敢倦，公與吾叔互相戒勉，謂零丁若此，如不知奮，何以慰親，因誦且泣下，率以爲常。後公特繪《篝燈課子圖》，先後凡四軸，蓋恩勤鬻閔，刻不能忘也。公念太夫人劬勞日甚，責望日切，甲子遂入省就師。乙丑服闋，年十五應童子試，輒冠軍，入貴筑邑庠，明年補廩餼。學使顧晴芬先生皐亟嘆賞，績竹石小幀題贈，以國士待之。肄業貴山書院，課金悉寄資家用，僅留課米自給。偶點名未及，薄減課銀，恐失太夫人意，私典短衣，益其數以歸，公之順承曲至如此。己巳設帳省垣，携我

叔父同讀。是年冬，吾母猶夫人來歸。越歲庚午，年十九，復携我叔父讀書高峰寺中，距家百餘里。是秋舉鄉試第一，計偕北行，迂道至廣西，訪我大父昔年友，教秀峰、潯江書院所知交及遺文，得若干首。所至遊覽山川形勝，俯仰今昔，輒作爲詩歌以誌感懷。甲戌再上公車，未第，歷年皆籍館穀爲菽水資，爲吾叔與姑經營婚嫁，亦困乏之甚矣！丁丑成進士，朝考第一名，入翰林，僦居庶常館。與公同年祁文端、蔣藻、王曉林侍郎植、周藹餘少京兆貽徽、沈舜卿、魏皆、陳小

瀛、徐熙庵法績三給諫，凡七人，朝夕切劘，公績有《芸館讀書圖》紀其事。己卯散館，一等第五名，授編修。庚辰假歸，迎太夫人就養京邸，辛巳補武英殿纂修，充順天鄉試同考官，得士瑞端、元書雲、史紳、趙玉、田瓚等十八人。十月，充國史館協修，派本衙門撰文。壬午七月，補武英殿總纂。八月，補提調，充順天鄉試同考官，得士雷魯卿、學濤、傅竹莊、德謙、李蔭堂、舒林等十六人。是年，我叔父以優行貢成均，挈眷繼至，怡然歡養，團聚一庭，公志始稍慰焉。甲申大考，二等第十九名，賞卷緞。乙酉，京察一等引見，交軍機處記名以道府用。五月，充湖南鄉試正考官，得士張學庭等五十五人。李文恭星沅、勞文毅崇光、黎給諫吉雲、陳員外起詩、方太守宗鈞、陳海陽永皓、黃笠屢維同、聶竹泉鈺敏諸大令，皆同榜，得人稱最盛，公有《湘山肇秀圖》之績。丙戌，補國史館纂修。丁亥七月，校刊仁廟聖訓告成，奉旨，遇有應升之缺議叙，注明候升。戊子二月，京察一等引見，交軍機處記名以道府用，充文淵閣校理。七月，充河南鄉試正考官，得士劉世勳等八十六人。張侍讀桐、丁員外彥儔、祝太守祐、伊靜泉仁、魏春塘文翰、胡克庵丕

昌諸大令，皆同榜所取，多知名士。後丙午，補續《憶遊百泉圖及門歌詠》紀之。京宦十有三年，公餘則伏案力學，精勤刻苦，無異爲諸生時。雖居清秘，究心經世之學，於國家掌故、六曹事例因革，綜核無遺，故爲曹文正振鏞、汪文端廷珍、姚文僊文田、王文簡引之諸公所推重，孝行清望著當時，以此得太夫人歡焉。

己丑五月，簡放四川叙州府知府，時方盛暑，公先單車赴任，越數月，乃迎太夫人至，舉凡行一政，決一獄，皆爲太夫人告。莅任未及一年，飭紀振綱，百廢俱舉。公廉潔自矢，庶務手自親裁，約束家丁、書役極嚴，無敢有作奸犯科者。勤於聽斷，凡詞訟案件隨即訊結，從不拖延。勸民息訟保家，險健少戢，嚴禁佐雜差役坐場攬訟之弊。暇則巡行各鄉，勸農觀稼，問民疾苦，刻印樹桑、百益諸書數萬本，散佈民間。及所屬縣長吏賢否，千里外纖悉周知。土豪猾胥皆斂迹，屬吏莫敢詭隨，風尚一變。戎州文風夙盛，公至益加培植，舊有翠屏書院，年久傾圮，特捐廉修葺，慎延掌教師儒。又以生童向無膏火，復捐廉添設。官課堂課親爲校閱，每士子謁見，教以立身，首崇孝友；爲文章，必根柢經史，不尚苟爲炳炳烺烺者。時招集院生於署，講晰經義，課以前賢語錄文字，爲立背經章程，重給講資，以昭激勸。城鄉各義塾亦爲選擇端正蒙師。在城，則札委教官、捕衙，於春初親送啓館，在鄉，飭各首事先禮拜師長，俾多士知師嚴道尊。敬教勸學，隨時親往查考，以觀其惰，三勤，歷四年如一日也。士人爭相砥行立名，風俗日厚。其後掇取甲乙科，以逮及子若侄者，多公所裁成。至今猶對不孝等詳言，咸以爲郡人解讀書取科目，非當日

我公教澤所涵濡，弗及此。府役薛貴以母老辭退，親題「力養方長」額榜其門。其人益勉於爲善，鄰里多化者。民間孝友節義事，察訪確實，必手書匾額優獎，隨其舉報郡屬。馬邊、屏山等廳縣毗連保夷，時虞滋擾，令附近居民建修碉堡，編聯保甲，民恃以安。壬辰夏，筠連、雷波等處被水，公聞信即馳往拯救。或謂須俟憲檄，公毅然曰：「事急矣，何待爲！」乃星夜奔，詣宿破廟中，周歷查勘，按戶造冊，悉捐廉賑濟，亟疏洩水道，使有所歸，遂不成災，民困以解。事畢，歸告太夫人，憂慮稍釋。既幸水患之速平，又憾俸錢有限，不能多給以厚民也。每遇隆冬米價昂貴，必設立粥廠賑食貧民。城外大江水勢洶湧，行舟多覆，公於各灘口設立救生船多隻，工食自行發給，擇善士數人司其事，時往訪察，釐剔弊端，所全活無算。郡中舊有義塾及養濟、育嬰、義冢諸善舉，公從而整飭培益之，獨恤嫠之會闕如，公惻然，敬承太夫人意，縮集廉俸千金，創立勵節堂，郡人士贊成之，買田取租，籍孀婦貞女之無依者，俾得生養，條規皆手訂，勒石以垂久遠。留題楹聯云：「極堪憐寡婦孤兒，相期保護扶持，隨地皆行方便事；最可敬貞操亮節，好自艱難忍耐，上天不負苦心人。」越十載，公由蜀之豫，奉太夫人舟過叙州，郡人士迎候河干，堅留信宿，具餐於堂，太夫人長生位在焉。恒以太夫人誕日，演劇爲壽。後聞太夫人訃，復設祭於堂，專使至黔中吊奠，蓋郡人士固深感我公之仁惠，尤善體我公之孝思矣。嗣郡人聞公薨，設木主於太夫人之左以祀。

壬辰秋，移任成都，叙人扶老携幼，卧轍攀留，泣拜道旁不忍去。十月接篆，首郡煩劇，日有

發審案件，研鞫巨讞，審慎籌思，每達旦不寐，罔不廉得其情。與民相對，必和顏溫語以導之，使得盡情伸訴，從不輕加訶責。以爲若本良民耳，一遭笞撻，敗其廉耻，遂玷終身，將何以自全乎？公少年孤露，備涉艱辛，閭閻疾苦，尤所洞悉。民感公廉正，有「青天」之稱；服公明察，有「神仙」之喻。猶憶有老民興訟年久，拖累多人，至是復控，公委婉諭導，揭其不甘止訟之情，洞中肺腑，老民帖服叩首，不覺以手撫公膝曰：「外間稱爲張神仙，洵不誣也！」侍役群訶，公領而止之，案立結。某紳無子，欲立弟之子爲嗣，外任時，遣弟歸，置產契約，命書其兩子名以畀之。後與弟不和，弟既沒，索契售田。其侄匿契弗與，弟之婦情迫致訟，始於道光八年，案懸莫結。至是，某紳復以犯尊爲詞促審。公查悉其底蘊，手書數百言付抱告，揆理酌情，爲籌全策，總期無失前好，永息後爭，語意殷諄，不惜詞費。某紳愧悟，雅敬畏公，亦遵斷而息，傳頌一時。公念首郡訟獄繁多，加以每日接見僚屬賓客，竟無暇晷。恐或曠廢，責令各房書吏每十日將審轉、議詳、審詳各案，開列四柱清單送閱，舊管新收開除，現在期內催請，違者責懲。故几無留牘，亦不積壓以病民。嘗聞公語寮友曰：「每遇簽差拘提，必於票尾硃書。如敢籍票需索滋擾，許扭稟重懲。或經訪聞，銷票時責革。該役赴鄉出票，先以懾其氣，民間亦不售其欺。若定限某日到案，前期一二日坐堂判事之餘，即嚴詰某案某差何以有意遲延，逾限到，則同役必相告，庶免勒措凌磨。非此即敢言無弊，特較愈耳。州縣尤宜行之。」凡案結，必詰問署中花費若干，有無訛索，察其詞色，真僞立剖。故吏役咸畏憚，奉公守法者爲多。公雖政務殷繁，請謁者